



Centro Nacional Chega!!P

Da Memória a Esperança



Istória Badak Masakre Maulau

Loron 07 – 09 Agostu 1975

Molok asaun armadu UDT nian iha loron 11 fulan Agostu, FRETILIN no UDT hamutuk ho sira nia membru no apoiante halo ona atake ne'ebé esporadiku ba sira nia adversariu husi suku seluk no iha suku laran, hodi oho populasun sivil sira barak. Atake hirak ne'e halo makaas no bei-beik tebes iha área Laclubar (Manatuto), Turiscai (Manufahi) no Maubisse (Ainaro). Atake ida ne'ebé sériu liu, ne'ebé hala'o husi Membru no Apoiante FRETILIN no UDT ba sira nia adversariu mak asaltu ida ne'ebé akontese iha Suku Maulau, Postu Administrativu Maubisse, Munisípiu Ainaro iha inisiu fulan Agostu 1975.

Iha Maulau, tensaun aumenta bainhira líder FRETILIN (Francisco Xavier do Amaral) halo vizita ba Postu Administrativu viziñu hanesan Turiscai (Manufahi) no Lequidoe (Aileu), no tuir informasaun nia halo diskursu ida hodi insita violénsia ba comunidade. Nia husu ba simpatizante FRETILIN nian atu “Hamoos ai-tarak sira iha Lumoluli” Aldeia ida iha Suku Maulau. Sasin sira haktuir katak, ho diskursu husi líder FRETILIN ida ne'e maka, ikus mai hamosu atake husi simpatizante FRETILIN husi Liquidoe, Tursicai no Manumera (Turiskai) hamutuk ho Militante FRETILIN iha Aldeia Kudahei, iha Suku Maulau ba simpatizante UDT iha aldeia tolu seluk iha Suku Maulau hanesan Maleria, Lumoluli no Ussululi iha loron 07 fulan Agostu 1975. Durante asaltu ne'e, Simpatizante FRETILIN uza de'it arma tradisionál sira hanesan diman, katana, rama no seluk tan. Akontesimentu iha loron 07 Agostu 1975, kauza simpatizante UDT nain 14 hetan oho hamutuk iha fatin ida de'it iha Aldeia Lumoluli, enkuantu na'in 10 resin seluk oho iha fatin keta-ketak iha Aldeia seluk iha Suku Maulau.

Sasin moris ne'ebé hanesan mos Vítima/Autor husi Parte UDT Sr. Bernardo Tilman ne'ebé nia Aman rasik no Tiun rasik ema oho iha akontesimentu ne'e haktuir katak, iha loron 07 Agostu 1975, simpatizante FRETILIN ne'ebé mai husi Liquidoe no Turiscai, hamutuk ho simpatizante husi Aldeia Kudahei (ne'ebé hanesan nia Tiun no Avon sira rasik) mak halo asaltu ba sira nia fatin iha Kiras, Aldeia Lumoluli, hodi oho Ema na'in 14, ne'ebé inklui nia Aman rasik no nia Tiun rasik. Iha akontesimentu ne'e, simpatizante FRETILIN sira uza de'it mak arma tradisional sira hanesan rama no diman.

Husi akontesimentu ne'ebé hala'o husi simpatizante FRETILIN iha loron 07 Agostu 1975, maka Simpatizante UDT sira husi Ermera no Maubisse ho kilat lolon ida ba fó apoiu fali ba Simpatizante UDT iha Suku Maulau liu-liu iha Aldeia Lumoluli hodi ba halo asaltu fali ba Simpatizante FRETILIN iha Aldeia Kudahei iha loron 09 Agostu 1975. Iha akontesimentu ne'e sira oho simpatizante

FRETILIN na'in 24 iha fatin ida naran Kudahei no na'in 2 seluk iha fatin ida ketak ne'ebe besik mosu fatin Kudahei.

Sasin moris ne'ebé hanesan mos Vítima/Autor husi Parte FRETILIN Sr. Jacinto rekoñese katak, konfliktu interna (funu maun-alin iha Suku Maulau) akontese tanba diskursu husi Lider FRETILIN (Francisco Xavier) ne'ebé husu atu "Hamoos ai-tarak sira iha Lumoluli", ho ida ne'e mak sira ba asaltu duni ba Simpatizante UDT iha Aldeia Lumoluli, ne'ebé barak liu hanesan sira nia familia rasik husi parte Mane Foun nian no kauza ema barak mate.

Tanba sa halo Rekonsiliaun?

1. Akontesimentu ne'ebé mosu iha loron 07 to'o 09 Agostu 1975, iha Suku Maulau, Postu Administrativu Maubisse, Munisípiu Ainaro, kauza Ema kuaze na'in 50 resin mate, sasan barak mak hetan sunu, animal barak mak mate tanba ema oho, seidauk rezolvidu no familia sira seidauk dame malu ho fuan no laran, maske iha tinan 2021 halo ona Prosesu Rekonsiliaun, maibé prosesu ida ne'e konsidera fó satisfasaun no benefisiu liu ba Parte UDT no husik hela kanek no fuan moras ba Parte FRETILIN, inkluindu juventude sira iha Suku Maulau.
2. Maske durante tinan barak nia laran, Vitima sira husi Parte 2, UDT no FRETILIN mesak Familia Deit (Uma Mane no Mane Foun) iha relasaun diak, maibe bainhira hanoin fali ba akontesimentu 07 to'o 09 Agostu 1975 hamosu fuan moras, fitar no kanek ne'ebé to'o agora seidauk kura, tanba ne'e liu husi Prosesu Rekonsiliaun ida ne'e bele halo matak malirin no dame malu liu husi kultura, nune'e labele fo impaktu ba sira nia jersaun tuir mai.
3. Liu husi Prosesu Rekonsiliaun ida ne'e bele hamosu Aktu Rekonsiliatoriu hanesan halo Monumentu no Monta Plaka Sinalizasaun nu'udar hodi dignifika no simblu ba dame entre vitima sira ne'ebe lakon sira nia vida tanba interes ses polítiku sira. Vitima no Familia Vítima rasik husu ba Estadu katak, serake sira nia Maun-Alin kauze na'in 50 ne'ebé mate ne'e saudagati deit? Saida mak tenke halo?